

quibus procedit accipit a physica, sicut omnes scientiæ a metaphysica, & mathematica agit de quodam accidente substantiæ mobilis, quod originatur ab ipsa, & ad ipsam resoluitur; quantitas enim, de qua est mathematica, a substantia mobili materiali originatur, & ad ipsam ordinatur, cum propter ipsam sit; quare quæ est comparatio metaphysicæ ad omnes scientias, illa est physicæ ad mathematicam.

33 Quæres, physica subalternaturne rigorosè metaphysicæ?

Responsio pro me est negatiua, & hoc dico cum D. Thoma, quia tunc propriè, & rigorosè intercedit scientiarum subalternatio, quando cum earum diuersitate conclusiones scientiæ subalternatæ ita se habent, vt non sint vnibiles nisi ex principijs subalternatis, adeout subalternata non habeat propria & immediata principia per se, sed mutuetur principia mediata a subalternante; non ita se habet physica respectu metaphysicæ, cum habeat principia propria immediata, & per se nota, quæ non indigent secundum se notificatione metaphysicali, cum non habeant per se medium a priori, per quod probantur, ergo &c.

34 An verò physica sit vna specie, aut genere scientia, Comptobus disput. 1. primo physicorum sectione 2. n. 3. ait esse vnam, non specie, sed genere ob varios partiales tractatus, quos instituit de rebus specie distinctis, vt de quantitate, motu, vbi, vacuo, & similibus. Ego tamen non adhæreo, quia, ea, quæ in physicis tractantur per se sunt illa, quæ dictam scientiam specificant, non ea quæ secundario & per aliud tractantur; ea quæ per se tractantur in consequenti discutientur sectione, vnde hæc difficultas soluta erit.

## SECTION II.

### *Quodnam sit physicæ obiectum.*

**M**VLtæ sententiæ de obiecto huius scientiæ physiologicæ in scholis præsentatæ sunt vsque modo, & ita variè inter se, vt nullo modo videtur quod veritas ab hominibus inueniri possit; quare antequam ad meum placitum proponendum deueniã, prius aliorum opiniones adducam illas confutando; deinde quid, quotuplex sit obiectum, & quodnam huius scientiæ propriis determinabo.